

Minister Watty Vos:

"Trabao nunca a mata"

ORANJESTAD (AAN): Durante di e fenomenal encuentro di AVP na Noord diabierna anochi, Minister Watty Vos a splica otro diferencia grandi entre AVP y MEP. E diferencia ta cu AVP incansablemente a y ta traha pa Pueblo y e otro nan incansablemente a y ta keha cu tin mucho cos di haci y pa e motibo aki NO POR!

Watty Vos : "Nos a traha masha duro na 1986 ora cos tabata malo na Aruba pa mayoria di famianan. Ora nos tabata den e peor crisis di historia di nos pais. Nos a traha dia y anochi pa rescata nos pais. Nos a trece hopi inversionista y a crea trabao y entrada pa nos hendenan. E progreso cu Aruba a conoce for di 1988 ta resultado di e trabao duro di e tempo ey. Loke nos a tende MEP bisa e tempo ey tabata cu AVP a traha mucho duro. Cu AVP a haci mucho hopi den mucho tiki tempo. Y cu esey ta malo. Nos tur ta corda con nan a keha y critica. Acaso nan a kere cu nos lo a haci manera

nan y sinta keha riba tur cos sin haci nada? Acaso nan a kere cu nos lo a sinta warda pa otro hende bin haci e trabao pa nos ?

Si nos a haci manera nan, awe ainda Aruba lo ta den e situacion di crisis di e tempo ey, cu hopi hende sin trabao, cu sueldonan masha abao, cu schoolnan sera y dolor tur caminda. Pero Aruba a cambia y a cuminsa progresa manera ningun hende a spera. Y ta gracias na trabao duro di nos hendenan y liderazgo di AVP cu esey a socede ! E biaha aki atrobe nos a traha duro pa drecha tur loke nan a laga destroza atras y pa haci tur loke nan a keda sin haci pa Pueblo durante di 5 aña. Y den apenas tres aña nos a cumpli ! Caminda nan a debilita polis, nos a reforza polis! E aña aki so caba nos lo tin mas cu 100 polis extra riba caminda! Caminda nan a nenga Pueblo tereno pa traha cas, nos a duna Pueblo tereno na gran cantidad. Caminda nan a nenga di bende Pueblo e casnan di FCCA, nos a



Ministro Watty Vos

bende nan cu esnan cu ta bira aden y cu tabata paga huur pa masha hopi aña si speranza cu e cas lo bira di nan. Nos a percura pa nan bira doño di nan cas.

Caminda MEP a keda sin drecha trafico nos a inverti masha hopi placa pa mehora esaki tur rond di Aruba. Caminda MEP atrobe a laga San Nicolas un banda, nos a inverti miyonna den vivienda, den schoolnan, den infraestructura, den facilidadnan di deporte y recreacion. Tur

caminda pa añanan largo MEP a keda sin mantene nos infraestructura, nos a bin y den tres aña a haci mas cu nan a haci den 5 aña! Esaki a existi trabao duro. Pero nos no sa core pa trabao. Mi tata tabata bisa trabao nunca a mata. Ta flohera sa mata."

CARGA BO RESPONSABILIDAD: Cu e experiencia grandi di bida y politica cu e tin Minister Watty Vos, e politico mas experiencia y gobernante mas versa, a muestra cu ora Bo tuma un responsabilidad riba Bo, Bo tin cu cumpli y no busca excusa pa no hacie. Watty Vos:" Bo no por core campaña y bisa Pueblo cu Bo ta bay haci algo y ora Bo drehta gobierno Bo no ta hacie. Bo tin cu carga Bo responsabilidad pa tur cos den e funcion cu Bo asumi y pa loke Bo a priminti. MEP a core campaña den pasado y a priminti 'un futuro briyante'. Pero ora nan a drehta gobierno nan a bin splica Pueblo cu NO POR, cu ta mucho trabao, cu AVP a haci mucho

hopi cos caba, cu Hulanda no kier y tin falta trahador, etc.

Tur excusanan pa no traha duro pa wak pa cumpli cu pueblo y carga nan responsabilidad como gobernante y como politico. Nan a faya y a decepciona Pueblo. Mirando con MEP a haci cada biaha cu nan a drehta gobierno, di no haci loke nan a priminti, ta dos posibilidad tin. Of nan a priminti algo sin pense of cu nan no tabata sa con of no tabata kier a haci loke nan a priminti. Con cu ta nan no a purba y a muestra un falta di respet y responsabilidad politico enorme cu Pueblo di Aruba. Si awe Pueblo mes ta bisa cu MEP NO POR, ta pasobra nan mes a muestra cada biaha di nobo cu nan NO POR haci loke nan ta bisa. Y esey ta masha peligroso pa un pais manera Aruba cu tin tanto capacidad pa sigui crece manera den ultimo tres aña. AVP a bisa cu nos si por pone Aruba progresa y tur loke nos a compromete cu Pueblo, nos a cumpli."